

VENDIM
Nr. 155, datë 30.6.2021

MBI SHQYRTIMIN E KËRKESËS SË SHOQËRISË OST SHA PËR ZGJATJEN E PERIUdhËS KOHORE, TË PARASHIKUAR NË PIKËN 3, TË VENDIMIT NR. 89, DATË 31.3.2021

Në mbështetje të neneve 16 dhe 20, të ligjit nr. 43/2015, “Për sektorin e energjisë elektrike”, të ndryshuar; si dhe të nenit 15, të “Rregullores për organizimin, funksionimin dhe procedurat e ERE-s”, miratuar me vendimin e Bordit të Entit Rregullator të Energjisë (ERE) nr. 96, datë 17.6.2016, Bordi i ERE-s, në mbledhjen e tij të datës 30.6.2021, pasi shqyrtoi relacionin me nr. 96/5 prot., datë 28.6.2021, të përgatitur nga drejtoritë teknike, mbi “Shqyrtimin e kërkesës së shoqërisë OST sh.a. për zgjatjen e periudhës kohore, të parashikuar në pikën 3, të vendimit nr. 89, datë 31.3.2021”,

konstatoi se:

- Bordi i ERE-s, me vendimin nr. 89, datë 31.3.2021, mori në shqyrtim propozimin e shoqërisë Operatori i Sistemit të Transmetimit (OST sh.a.) “Për rregullat e tregut shqiptar të balancimit të energjisë elektrike nga data 1 prill 2021”, duke vendosur:

“1. OST sh.a. të vijojë procesin e regjistrimit të pjesëmarrësve në tregun e balancimit me formularët e pandryshuar, sikurse është vepruar gjatë periudhës *dry run*. Rubrikat të cilat nuk mund të plotësohen, të lihen të paplotësuara duke argumentuar arsyet përse nuk mund të plotësohet një rubrikë rast pas rasti.

2. Mekanizmi i garancisë financiare që OST sh.a. do të aplikojë për pjesëmarrësit në tregun e balancimit të jetë ai i përcaktuar në “Rregullat e mekanizimit të përkohshëm të balancimit”, miratuar me vendimin e Bordit të ERE-s nr. 193, datë 24.11.2017.

3. Për periudhën deri në 30 qershor 2021, periudha kohore e proceseve ku përfshihen edhe nominimet dhe llogaritjet respektive të disbalancave, të kryhet me interval kohor prej 1 ore.

4. Shoqëria OST sh.a. të raportojë dhe të dokumentojë çdo muaj, në lidhje me ecurinë e zbatimit të ‘Rregullave të tregut shqiptar të balancimit të energjisë elektrike’.”.

- Gjithashtu, përmes vendimit nr. 108, datë 22.4.202, Bordi i ERE-s vendosi miratimin e “Rregullave të përbashkëta të shlyerjes për shkëmbimin e energjisë”, në përputhje me nenet 50 (3) dhe 51 (1), të Komisionit Rregullator të Bashkimit Evropian 2017/2195.

- OST sh.a., nëpërmjet shkresës nr. 3712 prot., datë 10.6.2021, me lëndë: “Lidhur me zbatimin e vendimit nr. 89, datë 31.3.2021, ‘Mbi propozimin e OST sh.a., në lidhje me zbatueshmërinë e rregullave shqiptare të tregut të balancimit, prej datës 1 prill 2021’”, ka parashtruar se:

“- Në zbatim të vendimit nr. 89, datë 31.3.2021, ‘Mbi propozimin e OST sh.a., në lidhje me zbatueshmërinë e rregullave shqiptare të tregut të balancimit prej datës 1 prill 2021’, pika 3, OST-ja, që prej datës 1 prill 2021 e në vijim, për sa i përket periudhës kohore të proceseve ku përfshihen nominimet, llogaritjet respektive të disbalancave dhe proceset e tregut balancues, ka aplikuar intervalin kohor prej 1 ore.

- Për më tepër, edhe tregjet balancuese në rajon janë me rezolucion me bazë orare, dhe në zbatim të rregullave në fuqi OST-ja mund të shkëmbejë ose ndajë shërbime balancuese ndërkufitare me operatorët e sistemit të transmetimit të shteteve fqinje. Ndryshimi i rezolucionit në 15 minuta do të krijonte vështirësi në harmonizimin e proceseve dhe llogaritjeve përkatëse.

- Gjithashtu, aktualisht ne jemi duke operuar në përputhje me marrëveshjen FSKAR (si anëtarë të ENTSO-E), sipas së cilës kompensimi i devijimeve të paqëllimshme ndërkufitare ndërmjet palëve (TSO-ve) nuk është më në natyrë, por financiar. Llogaritjet dhe çmimi raportohen me rezolucion orar, në rastin e vendit tonë (çmimi i disbalancave), sepse konform rregullores për zbatimin e kësaj

marrëveshje duhet të përdoret çmimi i bursës por në mungesë të këtij çmimi përdoret çmimi i disbalancës.

- Për gjithë sa më sipër, OST sh.a. kërkon zgjatjen e periudhës kohore, të parashikuar në pikën 3, të vendimit nr. 89, datë 31.3.2021, për proceset ku përfshihen si nominimet, llogaritjet respektive të disbalancave, si dhe proceset e tregut balancues të kryhen me interval prej 1 ore, për periudhën deri në 1 janar 2022.”.

- OST sh.a., përmes *email*-it të datës 26.4.2021, në vijim të komunikimit me shkresën sipërcituar, ka kërkuar zgjatjen e periudhës së parashikuar në pikën 3, të vendimit nr. 89/2021, me qëllim harmonizimin e proceseve të tregut balancues dhe me vendet e rajonit të cilat operojnë me rezolucion prej 1 ore, ku gjithashtu kjo kohë do ishte e nevojshme dhe për maturimin e tregut të balancimit edhe në kuadër të shkëmbimit të shërbimeve balancuese në interkonieksion. OST sh.a. bën me dije edhe se është duke punuar me kontraktorin e platformës DAMAS për të implementuar të gjitha proceset me rezolucion 15 minuta, duke qenë në harmoni realizimi i proceseve të brendshme të tregut me atë në interkonieksion. Në diskutimet me kontraktorin e DAMAS-it koha e nevojshme për ta përfunduar implementimin e plotë është vlerësuar të jetë deri në fund të dhjetorit 2021.

- Mekanizmi i ri, i cili prej datës 1 qershor 2021 është duke u aplikuar në gjithë vendet anëtarë të ENTSO-E, përfshirë dhe OST sh.a., parashikon shlyerjen e disbalancave/devijimeve në nivel interkonieksioni me pagesë.

- Operimi i tregut të balancimit të energjisë elektrike në vendin tonë, që nga 1 janari 2018 deri në 1 prill 2021, është realizuar nëpërmjet aplikimit të “Rregullave të përkohshme të mekanizmit balancues të energjisë elektrike”, të miratuara nga Bordi i ERE-s me vendimin nr. 193, datë 24.11.2017. Këto rregulla kanë realizuar procesin e nominimeve dhe llogaritjet respektive të disbalancave me interval kohor prej 1 ore.

- Gjatë aplikimit të “Rregullave të përkohshme të mekanizmit balancues të energjisë elektrike”, si dhe gjatë aplikimit të “Rregullave të tregut shqiptar të balancimit të energjisë elektrike”, të miratuara me vendimin e Bordit të ERE-s nr. 106, datë 2.7.2020, nuk është raportuar/konstatuar problematikë e cila lidhet me intervalin kohor prej 1 ore, me të cilin është realizuar procesi i nominimeve dhe llogaritjet respektive të disbalancave.

- Sikurse evidentuar në pikën 3, të vendimit nr. 89, datë 31.3.2021, të Bordit të ERE-s, deri në 30 qershor 2021 nominimet dhe llogaritjet respektive të disbalancave kryhen me interval kohor prej 1 ore.

- Lidhur me rezolucionin 15-minutësh, OST sh.a. bën me dije se aktualisht po punohet për *upgrade*-in e platformës, për realizimin e nominimeve dhe llogaritjeve respektive me rezolucion 15-minutësh, dhe se sipas planifikimit nga kompania ofruese e këtij shërbimi platforma do të mund të kryejë proceset me këtë rezolucion jo më parë se muaji gusht 2021. Për këtë arsye, sa i përket periudhës pas datës 1 prill 2021, OST sh.a. propozon që deri në përfundimin e përditësimit (*upgrade*) të platformës për proceset e tregut balancues, të vijoje të përdoret rezolucion 1-orarësh.

Për gjithë sa më sipër, Bordi i ERE-s

VENDOSI:

1. Pranimin e kërkesës së shoqërisë OST sh.a., për zgjatjen e periudhës kohore të parashikuar në pikën 3, të vendimit të Bordit të ERE-s nr. 89, datë 31.3.2021.

2. Deri në 31 dhjetor 2021, periudha kohore e proceseve ku përfshihen edhe nominimet dhe llogaritjet respektive të disbalancave të kryhet me interval kohor prej 1 ore.

3. OST sh.a. të raportojë në ERE çdo 2 (dy) muaj, lidhur me ecurinë e procesit të përshtatjes së platformës IT, si dhe të nominimeve dhe llogaritjeve të disbalancave me interval kohor prej 1 ore.

4. Drejtoria Juridike dhe e Zgjidhjes së Mosmarrëveshjeve të njoftojë shoqërinë OST sh.a. mbi vendimin e Bordit të ERE-s.

Ky vendim hyn në fuqi menjëherë.

Për këtë vendim mund të kërkohet rishikim brenda 7 ditëve kalendarike, si dhe mund të bëhet ankim në Gjykatën Administrative Tiranë, brenda 30 ditëve kalendarike nga dita e publikimit në Fletoren Zyrtare.

Ky vendim botohet në Fletoren Zyrtare.

KRYETAR
Petrit Ahmeti